

Keindahan alam tarik pelancong ke Sabah

DE 2.6.2019 3

KOTA KINABALU: Penjagaan alam sekitar dan hidupan liar mempunyai impak besar kepada ekonomi di Sabah, kata Ahli Ekonomi Dr Rafiq Idris (**gambar**).



Sempena dengan Hari Alam Sekitar Sedunia 2019 (5 Jun 2019) Pensyarah Kanan Fakulti Perniagaan, Ekonomi dan Perakaunan Universiti Malaysia Sabah (UMS) berkata ia merupakan topik yang menarik terutamanya di negara membangun, di mana masyarakat membincangkan sama ada negara harus mengutamakan ekonomi atau alam sekitar.

Sebahagiannya mempertikaikan kemampuan negara membangun untuk mencapai kemajuan lebih baik sekiranya mereka tidak dibenarkan menggunakan sumber mereka dengan bebas, katanya sambil menambah soalan seperti sama ada peraturan alam sekitar menjejaskan produktiviti atau perkembangan ekonomi kerap di tanya.

Bercakap mengenai kepentingan penjagaan alam sekitar dan hidupan liar terhadap ekonomi di Sabah terutamanya, beliau percaya walaupun terdapat banyak isu dan berita mengenai alam sekitar dan hidupan liar di Negeri ini 'we are okay.'

"Kita masih mempunyai banyak persekitaran yang sihat, segar, bersih, tidak tercemar dan hidupan liar yang dilindungi. Bagaimanapun, usaha untuk mempertingkatkan lagi perlindungan alam sekitar dan pemuliharaan hidupan liar adalah amat penting dan usaha ini perlu dipergiatkan.

"Mengenai sama ada sebuah negara harus mengutamakan ekonomi atau alam sekitar terlebih dahulu, saya kata keduanya penting. Sudah tentu penjagaan alam sekitar dan hidupan liar memberi sumbangan kepada ekonomi," katanya.

"Bagi saya, ia membantu yang lain. Perlindungan alam sekitar dan pemuliharaan hidupan liar menyumbang kepada ekonomi. Sumber tertentu boleh diekstrak dengan cara yang tidak menjejaskan alam sekitar," katanya.

Mengenai sumbangan perlindungan alam sekitar dan pemuliharaan hidupan liar ke atas ekonomi Sabah, beliau berkata ia menghasilkan atau meningkatkan nilai ekonomi.

"Bagaimana? Dengan adanya pengurusan dan persekitaran perlindungan alam sekitar yang baik dengan program pemuliharaan hidupan liar yang baik dapat menjadi daya tarikan kepada pelancong.

"Persekitaran dan perlindungan hidupan liar yang baik akan menarik pelancong dari seluruh dunia untuk melawat Sabah. Dengan ini, ia berpotensi untuk terus menyumbang kepada sektor pelancongan Sabah. Dengan peningkatan bilangan pelancong, ia meningkatkan peluang perniagaan, mencipta pekerjaan dan menarik pelabur.

Mengenai mengapa terdapat sejumlah besar pelancong yang melawat Sabah, Dr Rafiq berkata ia bukan untuk berbelanja semata-mata kerana Sabah bukan destinasi membeli-belah.

"Orang ramai terus melawat Sabah kerana 'alam semula jadi.' Pantai, pulau, gunung, air terjun, hutan dan hidupan liar yang indah antara lain merupakan sebab utama pelancong datang. Kita akan dapat mengekalkan prestasi sektor pelancongan

jika kita terus melindungi alam sekitar dan hidupan liar kita.

"Dengan alam sekitar dan hidupan liar yang dilindungi, ia juga mempunyai potensi menarik pelabur atau ahli sains perubatan untuk datang untuk membuat penyelidikan. Semua ini akhirnya menyumbang kepada ekonomi negara," katanya.

Beliau berkata perlindungan alam sekitar dan kesedaran pemuliharaan hidupan liar telah meningkat di seluruh dunia, dasar atau peraturan mengenai ini telah berubah atau diperbaiki.

"Tidak mustahil sekurang-kurangnya dalam jangka masa panjang, perjanjian perdagangan akan termasuk keperluan ketat terhadap perlindungan alam sekitar atau hidupan liar.

"Perjanjian perdagangan baru-baru ini seperti Perjanjian Perkongsian Trans Pasifik telah menyaksikan komitmen yang lebih besar oleh negara-negara anggota untuk melampaui yang dinyatakan dalam CITES (Konvensyen Perdagangan Antarabangsa dalam Spesies Terancam Fauna dan Flora).

"Terdapat juga kemungkinan di masa depan negara-negara memboikot dalam perdagangan untuk produk tertentu jika negara-negara tersebut tidak mematuhi standard atau peraturan antarabangsa tertentu," katanya.

Sebagai kesimpulan, katanya, perlindungan alam sekitar adalah penting untuk mengekalkan prestasi ekonomi semasa terutamanya bagi sektor pelancongan.

"Kualiti alam sekitar yang buruk memberi kesan kepada pertumbuhan ekonomi dan kesejahteraan dengan menurunkan kualiti dan kuantiti sumber atau akibat kesan kesihatan. Terdapat satu badan maklumat yang mengesahkannya," katanya.